

# ЯНГИ ЎЗБЕКИСТОНДА ЭЛ АЗИЗ, ИНСОН АЗИЗ

Тирик, мағрур, ҳақ сўз қуролимиз бўлсин!



— 2022 йил—Инсон қадрини улуғлаш ва фаол маҳалла йили —  
Ассалому алайкум, азиз муштарий!

## ЎСТИҚВОЛ ҲОҶИ

Ватан ягонадир,  
Ватан биттадир

Қўштепа туманининг ижтимоий-сиёсий, маънавий-маърифий газетаси

1943 йил 6 мартдан чиқа бошлаган

www.istiqbolyuli.uz

istiqbol.43@mail.uz

2022 йил 17 октябр № 37 (8433)

### Муҳим ахборотлар

Ўзбекистон Республикаси Президенти Шавкат Мирзиёев "Саноат ишлаб чиқаришида хомашё узлуксизлигини таъминлаш бўйича қўшимча қулайликларни яратиш чора-тадбирлари тўғрисида" қарор қабул қилди.

\*\*\*

Ўзбекистон Республикаси Президенти Шавкат Мирзиёев "Ногиронлиги бўлган шахслар жамиятларига тегишли ташкилотларни давлат томонидан қўллаб-қувватлаш ҳамда ногиронлиги бўлган шахсларнинг бандлигига қўмаклашишга оид қўшимча чора-тадбирлар тўғрисида" қарор қабул қилди.

\*\*\*

Президент Шавкат Мирзиёев раислигида 11 октябр куни маҳаллаларни обод қилиш ва аҳолини ўйлантираётган масалаларни ҳал этиш бўйича устувор вазифалар юзасидан видеоселектор йиғилиши ўтказилди.

### "ПАХТА ШТАБИ" ХАБАР ҚИЛАДИ



Қуёшли кунлар ортада қолиб, кузнинг инжиқликлари ҳам бошланди. Аммо далаларда ҳали ҳосил бор. Уларни увол қилмай йиғиштириб олиш ҳар бир фермер хўжалиги аъзолари, йиғим-теримда иштирок этаётган уюшмаган аҳоли вакилларининг виждон ишига айланмоғи даркор. Ахир ҳар чанокдаги пахта ризқимизнинг бир бўлаги. Исрофга йўл қўйиш ношукурлик билан тенгдир.

"Пахта штаби" бошлиғи Шукрулло Собировнинг маълум қилишича, туманимиз фермерлари 17 октябргача шартномадаги пахта ҳосилининг 93 фоизини сотдилар. Довондан ошган фермерлар сони 85 тага етди. "Т. Бобоев-Едгорали", "Қорақушчи-Отабоев", "А. Алигавхаров-Лангар", улар ордидан "Ғиштмон-Чимкент" машина-трактор парклари хизмат кўрсатаётган фермер хўжалиқлари кластер хирмонига шартномада кўзда тутилган ҳосилни топшириб, режани ўринлатиб қўйдилар ёки бажариш арафасида турибдилар.

Режани бажариш марднинг иши, исрофни қадриятимизга зид, дейдилар. Фермер хўжалиқлари аъзолари, маҳаллаларнинг уюшмаган вакиллари! Қўштепани ҳам мард-у майдонлар қаторига чиқаришга, пахта ҳосили исроф бўлишининг олдини олишга бор кучимизни сафарбар этайлик!

### 15 октябр—Халқаро Қишлоқ аёллари куни



## ҚУЁШГА ПЕШВОЗ ЧИҚИБ...

Қишлоқ аёли, у уй бекаси, касб-кор, ҳунар эгасими, қуёшдан эрта уйғониб, меҳнатга пешвоз чиқади. Балки шунинг учун ҳам Яратган Эгам уни саҳарҳезлик фазилати билан сийлагандир. Балки шунинг учун ҳам унинг ишида унум бордир. Эҳ-ҳе, нозиккина жуссасида турмушнинг қанча-қанча "юк"ларини кўтармайди дейсиз қишлоқ аёли: фарзанд тарбияси, уй-рўзгор юмушлари, томорқа ишлари, қўй-мош, парранда парвариши... ҳамма-ҳаммасига улгуради. Айни пайтда муаллима, шифокор, чевар, иқтисодчи, фаррош... сифатида эл-юрт тараққиётига, ободликка ҳисса қўшади. Замона чақирғига "лаббай" дея майдонга чиқиб, улар фермерликда, тадбиркорликда, ҳунармандчиликда ўз ўрнини топ оляпти, эрақлар билан бир қаторда юзлаб иш ўринлари яратяптилар. Бир сўз билан айтганда, қишлоқ аёлидаги меҳнаткашлик, самимиятга ҳар қанча ҳавас қилсангиз арзийди. Шу маънода Бирлашган Миллатлар Ташкилоти 2007 йили таъсис этган Қишлоқ аёллари кунининг мамлакатимизда ҳам нишонланиши меҳнаткаш бу қатлам эъзозининг ўзига хос намоёиши бўлди.

Ўтган шанба куни туманимиздаги энг гўзал "Истиқбол" маданият марказида санага бағишланган тантана бўлиб ўтди. Бу ерга туманимизнинг барча соҳаларида меҳнат қилган

ва қилаётган аёлларнинг вакиллари таклиф этилдилар. Улар орасида фаррошдан тортиб томорқачилар, муаллима-ю, шифокорлар, тадбиркор-у, ҳунармандлар, деҳқонлар-у, маҳалла фаоллари кўзга ташланади. Уларнинг юз-кўзларида бу эъзоз-у, эътибордан мамнуният акс этади.

Дастлаб сўз туман ҳоқими Илёмбек Новиковга берилди. Ҳоқим бу ерда иштирок этаётганлар, улар орқали барча қишлоқ аёлларини сана билан табриклаб, меҳнаткаш шу тоифа тугайли қишлоқда турмуш даражаси тобора кўтарилиб бораётгани, томорқаларимиз, маҳаллаларимиз гуллаб-яшнаётгани ҳақида сўзлади. Пировардида барча соҳанинг энг фидойиларига ҳоқим ҳамда сектор раҳбарлари туман ҳоқимлигининг "Фахрий ёрлик"лари ва эсдалик совғаларини топширдилар.

Туман тараққиётига узоқ йиллар муносиб ҳисса қўшган маҳалланинг собиқ раиси Насибахон Топволдиева, фермер Зиёдахон Акрамова, муаллима Лолахон Эргашева, шифокор Моҳирахон Раҳимова, ички ишлар ходими Дилдорахон Ваҳובה, тадбиркор Мавлудахон Йўлдошева, пиллакор Ибодатхон Султонова, банк ходими Ойгул Юнусова, фаррош Матлубахон Юсупова сингари 25 нафар аёл бор. Дубайда ўтган паралимпия

ўйинларида энгил атлетиканинг диск улоқтириш йўналишида олтин медални қўлга киритиб, туман номини шарафлаган қишлоқ қизи Мунирахон Нёматованинг иродасига тан бермай бўладими?! Даврада унинг матонати ва салоҳияти ҳақида туман ҳоқимининг маслаҳатчиси Муҳаббатхон Мўйдинова алоҳида эҳтирос билан сўзлади.

Қуёшдан эрта уйғонадиган, озиқ-овқат хавфсизлигини таъминлашга ҳисса қўшаётган, Мунирахондек қизларни, ўқтам йигитларни улғайтираётганлар сафида мардона одимлаётган туманимиз қишлоқ аёлларини туман ҳоқимининг ўринбосари Дилзодахон Олимова, вилоят "Оқила аёллар ҳаракати" аъзоси Хадичахон Каримова мамлакатимизда биринчи бор нишонланаётган сана муносабати билан табриклаб, уларга мустаҳкам саломатлик, Ватан тараққиёти, юрт ободлигида янада фидойилик тиладилар.

Туманимиз санъаткорларининг дилтортар, шўхчан куй-қўшиқларига аёллар рақс тушиб, ғуборларини ёзишди ва даврадан унутилмас таассуротлар билан қайтишди.

Умида ХУДОЙБЕРГАНОВА  
Суратда: туманимизнинг турли жабҳаларида фидокорона меҳнат қилаётган қишлоқ аёлларидан бир гуруҳи. Бахтиёржон РЎЗИОХУНОВ олган сурат.

УШБУ  
СОНДА:

2

- \* "Тил—миллат қалби
- \* Мангуликка лойиқсан
- \* Она тилим

3

- \* Бу ўткинчи дунёнинг ҳаловати
- \* Ҳуқуқшунос нима дейди?
- \* Жаҳон айвонида

4

- Сабоқ бекати
- \* Аҳли дониш дейдиларки...
- \* Ақл-ақлдан қувват олар
- \* Ижодга меҳр уйғотиб...

## ИЛҲОМ

МАНГУЛИККА  
ЛОЙИҚСАН

Зийнатим – туркий тилим,  
Тийнатим, кўрким – тилим,  
Хазойин ул-маоний –  
Бебаҳо мулким – тилим.

Ўрхун-Энасой тоши –  
Тарихингга хатбоши.  
Чўкиб ётган битиклар,  
Айт, кимларнинг кўз ёши?

"Девону луғот ат - турк",  
Ҳикмат – "Қутадғу билик"  
Сени асраб-авайлаб  
Улғайтирган тол бешик.

Сен – қарлуқ, қипчоқ, ўғиз,  
Ҳар шева – тотли мағиз.  
Сенсиз "Гўрўғли" қайда?  
"Алпомиш" қайда Сенсиз?

Навоийми ё Бобур, –  
Вазнларда ўйнар нур.  
Бунда ҳар байт ортида  
Чин тафаккур уйғонур.

Гоҳо сиғмай қоғозга,  
Нидоларда яшадинг.  
Юракларнинг кафтида –  
Дуоларда яшадинг.

О, менинг мозий тилим,  
Сернаво созли тилим,  
Курашларда тобланган  
Сарбаланд ғозий тилим.

Токи миллат бор экан,  
Сен унга зеб, ёрлиқсан.  
Кўк қадар қадринг билан  
Мангуликка лойиқсан.

Инобат РИЗАЕВА.

## ОНА ТИЛИМ

Қачон сени танигандим,  
Қачон дилга меҳринг тушди?  
Сара сўзлар илинганим,  
Қанот бердинг, кўкка учдим.

Она тилим, Сен онамнинг  
Алласидан сингиган нур.  
Она тилим – ҳар одамни  
Уйғотувчи миллий ғурур.

Гарчи нўноқ шоир ўзим,  
Қудратингга таърифим йўқ.  
Аммо Сен бор ёруғ сўзим,  
Ҳар сатримда ёнади чўғ.

Забонимга берган чирой,  
Минг жилодир муҳаббатинг.  
Сирли, лекин дунёда бой  
Неча йиллик Ўрхун хатинг.

Тилим бийрон қилган калом,  
Ахир Сенсиз ким эдим, ким?  
Туғилмасдан бўлгандим ром  
Она тилим!..

Мунира ҚЎҚОНОВА,  
2-ихтисослаштирилган мактаб-  
интернатининг ижодий-маданий  
масалалар бўйича тарғиботчиси.

## Публицист ўйлари

Ўзбекистон халқ ёзувчиси Ўткир Ҳошимов эллик йиллик кузатувлари маҳсули бўлган "Дафтар ҳошиясидаги битиклар"идаги "Қанча кўп тилни билсангиз, шунча яхши. Бироқ одам она тилида тафаккур қилади, она тилида туш кўради, она тилида йиғлайди..." дея ёзганлари одамни мушоҳадага чорлайди. Ҳақиқатан ҳар қандай олим-у, фузало ҳам, қайси миллат вакили бўлмасин, ёзажак ишини даставвал ўз она тилида мушоҳада қилади, таҳлил этади, кейин хоҳлаган тилида қоғозга туширади. Ахир она тили унинг қонига ота-онадан, аждодларидан ўтган-ку!

(Такрорий)

## ТИЛ-МИЛЛАТ ҚАЛБИ

Қулоқ тутдингизми, у нималардан мамнун-у,  
нималардан маҳзун экан?

Яқинда бир кадрдонимизнинг гапи вужудимни титратиб юборди: "Набирамнинг тили русча чикди, десам ўзимга ҳам эриш туюляпти,—дейди у ҳайратини яширолмай. —Уйимизда ҳечким рус тилида мулоқот қилмайди. Нега ундай бўлиши керак?! Биз, хонадон эгалари қаерда хато қилдик экан, деган савол мени қийнапти. Уч яшар қизчага "папа, мама" эмас, "дада, ая" дегин деб уқтириб бўлмаяпти. Бошқа гапларни ҳам онасига рус тилида тушунтиришга интилаётганига ажабланыпман. Нима қилсак бўларкин?"

Суриштириб билдикки, бола энди тили чиқаётган пайтда планшет орқали мултфилмлар кўйиб бериш-ни талаб қилган. Она ҳам хархашасидан тўйиб, "Маша ва айик" мултфилмининг рус тилидагисини топиб бераверган. Бола ҳаммиша уни кўриш билан банд, она эса қизалоғи тинч ўтирганида уй юмушларини бажариб олаётганидан хурсанд бўлаверган. Юзаки қараганда, оддий ҳолатдек туюлган вазиятда она катта хато қилаётганини ўйлаб ҳам қўймаган.

Кадрдонимизга қизалоқнинг тилини ўзбекчалаб олиш учун уни боғчага бериш, болажонлар билан мулоқотда бўлиши учун имконият яратиш, тарбиячидан эътибор бериб туришини илтимос қилиш зарурлигини, имкони борича мултфилмларни ҳар доим эмас, кам-кам ўзбек тилидагисини кўрсатишни маслаҳат берамиз.

Бола-ку катталарнинг ўйлаб иш юритмаслиги оқибатида шундай вазиятга рўбаро қилинибди. Ҳали у гўдак, хатони тузатиб олиш кўп вақт талаб қилмас. Аммо ўзбек тилига давлат тили мақоми берилганига ўттиз йилдан ўтган бўлишига қарамай, ҳамон тилимиздаги қусурлардан халос бўла олмаётганимиз ҳам бор ҳақиқат.

Газеталарда Президент сайловини ўтказувчи Марказий, округ, участка сайлов комиссиялари таркиблари эълон қилинди. Рўйхатларни кузатган одам ҳазрати инсонларга дахлдор исм, фамилия ва шарифлардаги хатоларни кузатиб таажжубланмай қолмайди. "Юлдашев", Низомходжаев", "Ататжанова", "Джўраев", "Шовкатжон", "Муҳаббат" ва ҳоказо.

Қизиқ, умр бўйи одамга ҳамроҳ бўладиган, шахсини тасдиқлайдиган ҳужжатга ҳам шу қадар беписанд муносабатда бўлинадими? Ахир ўзбек тилимизга давлат тили мақоми-ни берган қонунда бундай хатоларни тузатиб олишга изн берилган эди-ку! Фарзандингизга туғилганлик ҳақидаги гувоҳнома олишда мутасаддилардан ҳужжат ўзбек тили қоидаларига риоя этилган ҳолда ёзилишини талаб қилиш ҳам сизнинг ҳуқуқингиз эканлигини унутмасангиз яхши бўларди.

Илгарилари аксарият ҳолларда русийзабон мутасаддилар исм-ша-

рифларни ўз тили талаффузи асосида бузиб ёзганлар. Ҳозир-чи? Нега бундай масъулиятли вазифада фаолият юритаётганлардан ўзбек тили қоидалари асосида иш юритиш талаб этилмайди?! Исм, шариф ва отасининг исмини ёзишда икки, уч, ҳатто тўрт-бештадан хатоларни учратишга шу қадар кўникиб кетилдики, ўзбек тилига бундай беписанд ёндашув оддий ҳолатга айланиб қолди.

Оилавий, миллий кадриятларни тиклаш ва жойига қўйиш ҳақида турли минбарлардан туриб бот-бот жон куйдириб гапирилади. Аммо бўлаётган жараёнлар гап бошқа-ю амалда иш бошқа эканлигини кўрсатиб турибди. Айтайлик, руслаштириш тизимидан чиқиб кетилганига 30 йилдан ўтибди ҳамки, айниқса, муомала-муносабатларда руслардан кириб, мустаҳкам ўрнашиб олган одатларни тарк эта олмаёпмиз: расмий идораларда "фалончи фалончиевич" ёки "фалончи фалончиевна" қабилидаги муносабатлар камайиш ўрнига бардамалаб боряпти, десак хато бўлмас.

Яқинда ҳаддимиз сиққан бир амалдорга "...вич...вич"лардан қачон халос бўламиз, шу одамга ўзбекона исмларини айтиб, мурожаат қилаверсангиз бўлмайди, ахир сиздан ёш-ку" десам, "ҳурматсизлик бўлади-да" дейди. Ўзбекона ҳурматни қачонгача руслашган одатлар билан ўлчаймиз?! Бу одатлардан ўттиз йиллар аввал воз кечиб юбориш керак эмасмиди?! Ахир ўзимизнинг тилимизда ҳам ёши улуғ, тажрибали кишиларга "устоз", тенгқурларга "биродари азиз", "дўстим", амалдорларга "ҳоким буво", "бошлиқ жаноблари" сингари гўзал аталаримиз бор-ку! Ёки оддийгина қилиб "фалончи ака", "фалончи опа", "ака", "синглим" дея муносабатга киришишнинг нимаси ҳурматсизлик!!! Янада ачинарлиси, миллий кино ва сериаллар орқали бу муносабат ёшларнинг онгига шу қадар сингдириляптики, кейинги йилларда яратилган кинофилмлар персонажларининг муомала-муносабатларида "...вич", "...евна"-лар урчигандан-урчиб боряпти. Булар, албатта, ўзбекча одат ва кадриятларимизга соя ташламай қолмайди. Аммо миллий кадриятлар бардавомлиги ва ўзбек тили тақдирига дахлдор мутасадди идоралар масъуллари тегишли таъсир ўтказа олмаётгани ачинарлидир. Ахир бу борада бутун бир Департамент фаолият юритиб турибди-ку!

Ҳазрат Навоий асос солган тил дунё минбарларида янграётган, ривожланган мамлакатларда ҳам унга қизиқиш ортиб бораётган бир пайтда мамлакатимиз миқёсидаги ахборот воситалари—хусусий телеканаллар, ижтимоий тармоқларда миллатдошларимизнинг ўзлари бу неъматга ўта беписанд муносабатда бўлаёт-

ганлари ачинтиради одамни. Миллионлар томоша қилаётган кўрсатувларда ўзбекча-русчани аралаштириб сўзлаш, ҳар икки тилга ҳам ўта ҳурматсизликдир. Ижтимоий тармоқларнинг қайси бирини кузатманг, саводсизларча жумлалар, сўзларга дуч келасиз. Тобора бардамалаб бораётган бу иллатларга қарши бонг урадиганлар борми, дея хунобинг ортади одамнинг.

Ўзбекистон Республикаси Президентининг ўтган йил 2022 йил 20 октябрдаги "Мамлакатимизда ўзбек тилини янада ривожлантириш ва тил сиёсатини такомиллаштириш чоратадбирлари тўғрисида"ги Фармони билан "2020-2030 йилларда ўзбек тилини ривожлантириш ва тил сиёсатини такомиллаштириш концепцияси" тасдиқланганидан хабардоримиз. Унда дастлаб 2020-2022 йилларда концепцияни амалга ошириш дастури ва кейинги ўн йил учун асосий йўналишлари белгилаб олинган. Тил тараққиёти ва софлигини сақлаш, уни бойити бориш, аҳолининг нутқ маданиятини ошириш, таълимнинг барча тизимлари, телерадиоканаллар, Вазирлар Маҳкамасининг Давлат тилини ривожлантириш Департаменти, вазирлик ва идоралар олдида турган вазифалар аниқ-тиниқ белгилаб берилган.

Давлат тили тўғрисидаги Қонуннинг амал қилиши, Президентнинг давлат тилига дахлдор фармонлари ижроси, бошқа миллат ва элатлар тилларини ҳурмат қилган ҳолда, жамоат назоратига кўп жиҳатдан боғлиқдир. Модомики, бу ҳуқуқий-меъёрий ҳужжатлар бутун халқимизнинг манфаати, халқаро нуфузи учун хизмат қиларкан, нима учун жамоат уни назоратига олмаслиги керак?! Нафсиларини айтганда, қачонлардир камситилган, таҳқирланган тилимиз Истиқлол шарофатидан қаддини тиклаган, жаҳон айвонида бўй кўрсатаётган, давлатимиз раҳбари, ҳукуватимиз унинг ривожини учун имкониятлар эшигини очиб бераётган экан, айрим миллатдошларимиз унинг бузиб талқин қилинишининг бевосита иштирокчиси бўлиб қолишига қачонгача томошабин бўламиз?!

Тилда миллатнинг қалби, маънавияти акс этади, дейишларида улуғ ҳикмат бор. Азизим, қалбингизга қулоқ тутинг, у нималардан мамнун-у, нималардан маҳзун экан? Аждодларимиздан қолган энг ноёб меросимиз, боримиз-у, оримиз, мавжудлигимиз, бутун ҳаётимиз ва фаолиятимиз асоси бўлган, бошқа миллат вакиллари ҳам ўрганаётган, хорижда тобора қизиқиш ортиб бораётган бу муқаддас неъматимиз софлигини асрай оляпмизми? Хулоса чиқариш ўзингиздан.

Ҳадичахон КАРИМОВА,  
Ўзбекистон Журналистлар  
уюшмаси аъзоси.



## Расулulloх (с.а.в.) хадисларидан



Ризқ ва эҳтиёжларингизни талаб қилишни эрталабдан бажаринглар, чунки тонгда баракот ва муваффақият бордир.

Ҳазрат Ойша (розияллоҳу анҳо)дан.  
Ибн Адий ривояти.

Овқатларингизни совутиб энглар, шунда баракот бўлади.

Ибн Адий ривояти.

Оталарингизга яхшилик қилинглар, шунда болаларингиз ҳам сизларга яхшилик қилишадди. Аёлларга қарайверманг, шунда сизларнинг аёлингизга ҳам қаралмайди. Кимга узр айтилса-ю, у ўша узрни қабул этмаса, қиёмат куни ҳавзга тушмайди.

Жобир (розияллоҳу анҳо)дан.  
Ҳоким ривояти.

“2002 ҳадис”дан.  
(Ҳадиси шарифларда одоб-ахлоқ зикри).  
“Мунир”нашриёти.  
Тошкент—2022.

# Saboq bekati



Оз-оздан ўрганиб  
доно бўлур,  
Қатра-қатра йиғилиб  
дарё бўлур.  
Алишер НАВОЙЙ.

Аҳли дониш дейдиларки...

## ТИЛНИНГ АСОСИЙ БЕЗАГИ – РАВШАНЛИК

Тилда халқнинг бор-йўғи, унинг буткул ватани гавдаланади... Тил халқнинг ўтмиши, ҳозирги ва келажак авлодини буюк бир яхлитликка, тарихий, жонли бир жипсликка айлантирувчи энг ҳаётий, энг бой ва энг мустаҳкам воситадир.

К. Д. УШИНСКИЙ.

Тилсиз на шахс, на халқ ўзининг фикр-туйғуларини бошқаларга ўтказолмайди, айниқса, келажак авлодга қолдирилмайди.

Х. АБОВЯН.

Кимки ўзга тилларни билмаса, ўз тилини ҳам яхши тушунмайди.

И. ГЁТЕ.

Тиллар қанчалик ғоялар билан бойиган бўлса, зарур сўзлар билан ҳам шу даражада бойиган.

Ж. БЕРНАРДЕН.

Тилнинг асосий беаги—равшанлик.

СТЕНДАЛЬ.

Тил равшанлиги—тафаккур равшанлигининг натижаси, равшан фикр эса муқаррар равшан шаклни тақозо этади.

В. ЛИБКНЕХТ.

Ҳар қандай халқнинг урф-одатларини билай десанг, аввало унинг тилини билишга урин.

ПИФАГОР.

Ҳаёт, тил, урф-одатларнинг табиийлиги миллатнинг кучига куч қўшади, ҳаётда дабдабалилик, тилнинг жим-жимадорлиги, тантиқ урф-одатлар эса уни ожизлик ва ҳалокатга маҳкум этади.

Ж. РЕСКИН.

Тил—миллатнинг қалби. Тил ғоя, туйғу, тафаккурнинг жонли мужассамидир.

А. Н. ТОЛСТОЙ.

Халқ тили ҳамиша миллий руҳ билан чамбарчас боғланган.

В. ГУМБОЛЬДТ.

Ўз ватанинга бўлган чинакам муҳаббатингни ўз тилинга бўлган муҳаббатингиз таъсир этиш мумкин эмас.

К. Г. ПАУСТОВСКИЙ.

“Тафаккур гулшани”дан.  
Ғафур Ғулom номидаги  
Адабиёт ва санъат  
нашриёти.  
Тошкент—1989 йил.



Буюк сиймога таъзим

Ақл-ақлдан қувват олар

## ТИЛИНИ БИЛСАНГ, ДИЛИГА ЙЎЛ ТОПАСАН

“Тилни билиш—дилни билиш”, “Тилни бил—дилни билишга йўл очилади”, “Тил топилса, душман ҳам дўст бўлар”, “Тил—дил тилмочи”, “Тил билган навкар—бол билан шакар, тил билмас навкар обрўни тўкар”, “Тил билган йўлда қолмас”, “Қардош тилни билмоқ—қадрдонлик белгиси”. Булар билан ота-боболаримиз киши ўз она тилисини яхши билишидан ташқари ўзга эллар тилини ҳам ўрганиши лозимлигини уқтириб, бунинг аҳамияти катталигини, ўзга эллар тилини билиш—уларнинг дилини билишга, улар билан жавоб-муомала, борди-келди қилиш, дўстона алоқалар ўрнатиш сари йўл очиб беришини қайд этганлар.

“Ҳикматнома”дан.  
Тошкент—1990 йил.

Она тили ва адабиёт фани ойлиги давом этмоқда

## ИЖОДГА МЕҲР УЙҒОТИБ...



Мақтабимизда “Она тили ва адабиёт” фани ойлиги доирасида “Қадринг баланд бўлсин, она тилим” мавзусида ижодий-маданий тадбир бўлиб ўтди. Ушбу тадбирда шоир, “Истиқбол йўли” газетаси қошидаги “Ғунча” адабий тўғараги раҳбари Тоҳиржон Уринов, мактабнинг адабиётга қизиққан, ижодкор ўқувчилари қатнашдилар.

Ижодий кечада мактабимизда фаолият юритаётган “Нафосат гулшани” тўғараги аъзолари ўзларининг машқларини ўқиб бердилар. Зулфиқар Аҳмадалиева, Нафосат Ҳабибуллаева, Муқаддам Исроилова, Муштарий Исмоилова, Дилнавоз Муродилова, Дилнавоз Исроиловалар Ватан, она тили ва бошқа мавзулардаги машқларини ўқиб, устознинг эътирофига сазовор

бўдилар, зарур тавсия ва маслаҳатларини олдилар.

Жараёнда Тоҳиржон Уринов “Ғунча” тўғараги фолияти ҳақида гапириб, унинг фаолияти, ижодкорлари ҳақидаги филмни намойиш этди ҳамда ўз ижод намуналаридан ҳавола қилди. Ўзбек тили ва адабиёти фани ўқитувчиси ҳаракати билан туманимизнинг ёш ижодкорлари Фаридохон Юнусова, Шоҳсанам Омонова, Малика Ғафуроваларнинг шеърый китоблари тақдироти ҳам ташкил этилди.

Ўқувчи ёшлар томонидан тайёрланган кўшиқ, рақслар тадбирга ўзгача шуқуқ бахш этди.

Насибахон УМРЗОҚОВА,  
32-мактаб ўқитувчиси.

Билиб қўйган маъқул

## ГИЁҲЛАРДАН ФЙДАЛАНИБ

Турли дармонбахш гиёҳларни чой ўрнида дамлаб ёки улардан қайнатма тайёрлаб ичиш чарқоқни енгилда ва соғ-омон юришда фойда беради.

Бир ошқошиқ қуритиб майдаланган далачой (зверобой)ни 1 стакан қайноқ сувга солинади ва усти ўраб қўйилади, 30 дақиқа туриши керак. Кунига 3 маҳал чорак стакандан 2-3 ҳафта ичилади.

Қуритиб майдаланган 10 грамм баргизуб (подорожник) баргини 1 стакан қайноқ сувга солиб, устани яхшилаб ўраб 30 дақиқа тиндириш керак. Кейин сузиб олиб, кунига 3 марта 2 ошқошиқдан овқатдан 20 дақиқа олдин 2-3 ҳафта ичиб турилса, овқат ҳазмини яхшилади.

Кунига 1-2 марта карам тузламасининг сувини илтиб ҳар гал 1-2 ошқошиқдан бошлаб, то 0,5 стакангача ичиб туриш ҳам витаминлар танқислигида фойда беради.

Экзема, кўздан ёш оқиши, тананинг баъзи жойларига эшакем тошиши сингари ҳолатлар рўй берса, 4 дона пивэни майдалаб қирқиб, 1 литр совуқ сувга солиб, бир кеча сақлаш керак. Сўнг сузиб олиб сувини кун бўйи оз-оздан ичиш керак. Кўрда пиширилган картошкани ейиш ҳам фойдали. Бундай ҳолларда 10 грамм ялпиз ўтини 0,5 стакан қайноқ сувга солиб, 20-30 дақиқа тиндириб, кунига 3 марта 1 ошқошиқдан ичса ҳам бўлади.

Шунингдек, 1 ошқошиқ мойчечак гулини 1 стакан қайноқ сувга солиб, 20-30 дақиқа тиндириб, кунига 2-3 марта 1 ошқошиқдан ичиш ва пиширилган шолғомни доим истеъмол қилиш ҳам ҳолсизлик ва турли тери тошмаларининг олдини олишда кўмаклашади.

“Сиҳат-саломатлик” журналидан.

Азиз муштарий! Ҳафтаномамизда улуг аждодларимиз ҳаёти ва ҳикматлари чоп этилаётганлиги учун уни ножоиз ерларга ташламанг!

**ISTIQBOL YO'LI**  
МУАССИС:  
Қўштепа ТУМАНИ  
ҲОКИМИЯТИ ВА ТАХРИРИЯТ  
ИЖОДИЙ ЖАМОАСИ

**Бош муҳаррир:**  
Умидаҳон ХУДОЙБЕРГАНОВА  
Ўзбекистон Матбуот ва ахборот агентлиги  
Фаргона вилояти бошқармаси томонидан  
2007 йил 9 январда 12-012 рақами  
билан рўйхатга олинган. Бичими А-3

МАНЗИЛИМИЗ:  
151111,  
Марғилон шаҳар,  
Бобур номи маҳалла,  
Соҳибкор кўчаси, 4-уй.  
Телефон ва факс:  
муҳаррир (55) 801-17-54

ГАЗЕТА ТАХРИРИЯТИНИНГ  
Pentium - IV  
КОМПЮТЕРИДА  
ТЕРИЛДИ ВА  
САҲИФАЛАНДИ.  
Дизайнер:  
Отабек Ерматов

«Полиграф-Пресс» МЧЖ  
босмаҳонасида 3003  
нусада чоп этилди.  
Баҳоси келишилган нарҳда.  
Манзил: Марғилон шаҳар,  
Туркистон кўчаси,  
236 «Б» уй.

Нашр кўрсаткичи:  
64875  
Буюртма № 668  
Топшириш вақти 18.00  
Топширилди 18.00

Ушбу сонга масъул:  
Ҳадичаҳон КАРИМОВА  
ISSN 2010-9253  
9 772010 1925307